

思

軒

文

集

思軒文集卷之二十

墓誌銘

夔府知府致仕王公墓誌銘

公王氏諱譙字益夫號東齋常州晉陵人其先河東人  
七世祖德孚宋大理丞建炎南渡始遷晉陵曾祖貴和  
元揚州路儒學教授祖思明江浙行省左丞國初召輔  
皇儲擢右傳從

太宗皇帝之國于燕卒謚康懿考彥昭能背誦四書為  
燕世子伴讀後以公貴累贈中憲大夫太常寺少卿母  
某氏贈恭人公三歲能誦詩五歲讀孝經意頗領解祖

母張夫人奇之口授諸書便能尋繹長而篤學博聞強  
記宣德庚戌由宛平縣庠生入宵監壬子以能書選入  
文淵閣日給光祿酒饌正統初繕寫

宣廟實錄成試中書舍人賜白金二十兩綵幣二表裏  
初開經筵命書聖政記賜寶鈔三千貫庚申行大婚禮  
賜金織紗衣一襲癸亥五月廿四日雷震鷄吻上言宜  
杜絕倖進罷黜貪污既而閩浙盜起又上言乞甦民困  
罷征麓川遠役先是已頒賜書詔白金素幣至是又賜  
五經四書五倫書聞南京宮殿災及妖星示變又疏慎  
脩德政以回天意

上嘉納之已巳八月土木之變首陳保安

宗社之策曰選將帥募丁壯召勤王之師簡執政大臣  
累數百言皆一時要務時公為編修職在近密專典文  
書羽檄交馳筆不停揮而志於靖難亦屢有建白未幾  
給勅命贈封其父母妻明年景泰改元陞吏部稽勲  
郎中八月偕侍讀商公輅迎

太上皇於口外賜名馬寶鈔辛未內閣進勤政要典陞  
太常寺少卿是年瘞戰士骸骨三萬軀于都城西郊賜  
名憫忠阡命公題碑十一月上簡賢圖治章癸酉二月  
又上疏言作新政務以大矯時弊甲戌三月為廷試受

卷官四月持節使湖廣開封岷府二王事竣便道過  
帝始經營田宅為菟裘計十二月還朝調南京太常  
英廟復位進賀冊皇太子表箋至京留任太常特賜  
白金三十兩緣段三表裏寶鏤三千貫仍免戶內差徭  
蓋異數也公感激圖報會承天門災遂上敬

天法

祖開言路達下情用正人收羣望抑權倖遠近習八事  
言甚閭切當路者忌之居七月有再涖南京之命九載  
將遷竟改夔州知府公聞命欣然就道曰內何榮外何  
辱但勞吾遠涉耳遂送妻子還鄉單舸之任時天順庚

辰歲也先是民困橫歛煩刑公至一切更張之或謂太寬公曰祛除民患吾恐其不速耳復榜諭通衢俾革前非禁戢猾鹵生拘藉苴之徒取真西山諭屬四事演為十六叶以韻語以勉勵僚屬暮年殘暴歛迹時巨盜詹保兒等刼掠旁郡守令有挈印綬避去者夔獨晏然新寧監生曾鼎豪俠為鄉里患苦有疾其庶母誣鼎殺弟者同知孫軫推官孟英已鍛鍊成獄而弟實不死公廉知之且察鼎可化諭使改悔為之辯雪鼎後授冠帶卒為善士圖公像以報事之至於奏罷貊獸之獻停免採梟木造運船之科擾於民者民於是翕然稱之而公之

治行遂為蜀郡最焉三載入覲力請休致不許丙戌復  
請乃許之比歸創二別業一在郡城東一在郡南佳時  
勝自有與往來其間與一二知己清談賦詩稍暇則緡  
閑經史蓋雖老猶手不釋卷家藏古書幾萬卷古今人  
法書名畫數百種公善小篆楷隸皆臻其妙為文章壯  
偉詩沈著有體裁所著有土苴集東齋稿存于家元配  
莊氏贈恭人次李氏無子繼武氏先卒子二人長執中  
由武學生舉入翰林將授官而卒次時中女一人嫁卞  
詔孫男二人穀稷公壽八十有二以成化丁未正月六  
日卒明年十一月朔日葬懷德南鄉某村之原蓋公在

詞林游從諸老先生之日久自廬陵建安二楊公後以至泰和蕭公淳安商公多愛重之嘗有文以頌其美而予以鄉邑故尤辱公契厚晚年歸老于家又居相隣故公卒也遺命時中必得予銘而行述必屬之里徵士朱君忍易益忍易亦公交莫逆者至是時中以公意來告乃為之銘曰

楚楚王公有學有文爰仕于朝亦有讜言言之切直為時之忌三遷兩京一麾千里瞿塘灩澦途豈為窮禁林延閣時豈為通我知公心所重者內區區外累累奚足芥蒹投効來歸馮軾里門翠竹黃花樂乎丘園八十二年



從容待盡圖書滿家以遺厥胤惟是不朽公以屬予勒  
美垂休予無愧辭

封南京戶部員外郎沈公墓誌銘

公姓沈氏諱彝字懋常南京戶部湖廣司郎中暉之父  
以子貴初封主事加封員外郎命載下而公卒矣成化  
癸巳六月三十日春秋六十初公欲預營壽藏于鳳凰  
山未果至是公子曦營之二年而成乙未七月某日舉  
柩葬焉前期暉具公履歷來請銘沈氏世家吳興祖原  
澤元季為千夫長捍禦鄉邑有功同事者忌之乃變服  
間道走宜興家焉國初詔求遺逸擢代州同知以嚴

明著稱考德榮號松隱公年十八即代父治家久之為  
稅長典鄉賦公私事訖無不理鄉民遇凶歲即多逋竄  
而公府征歛愈急公為代輸其多至數百斛有負其私  
錢者棄責不問凍餒者衣食之其所全活至數十百人  
有山蓄草木貧有力者樵蘇共之不受其直築東堰堤  
以障水梵通衢以便行者駕石梁以濟渡捐布帛棺櫬  
以助婚喪鄉人德之先廬故湫隘乃謀改作于大潮山  
麓室成作家塾延師教子諄諄誨諭有服華美者手裂  
之故諸子咸知警懼而暉益加黽勉以明經登天順庚  
辰進士第歷官郎署文學政事卓有賢稱以荐承推恩

之典公既受封誥即謝絕公事敕斷家事即所居東偏  
闢園鑿池構亭列館實以圖史環以佳花名木與親朋  
觴詠其中以居臨太湖而年又漸高遂自號五湖一老  
云公美鬚髯善容止喜談論而於人無忤與之接者如  
飲醇醪不覺心醉少喪母徐終身哀慕母性嗜魚得嘉  
魚必薦父病侍湯藥夜不就寢盜窺其息肱篋至數千  
緡戒家人勿言曰恐以是戚吾親也嘗夜飲見長星燭  
天遽命撤席曰此吾

君臧膳時也吾徒何敢燕樂湖水嚙堤墊民田躬率鄉  
人䟽導之曰國計所仰夫豈為私計也公居猷畝常懷

天下之憂識者謂使公得用於時其所以經國而濟民者不讓古人顧乃歛之不施姑舉以授其子而恒切切焉戒暉以事

上治民所當究心遺之資以養廉俾一念在公而無累于私此公之道雖不自用而子能用之其所以來

寵命而荷褒顯者非偶然也公配崔氏元巡檢仲寶之孫初封安人加宜人生五男子曦暉昞暉昕昞早卒暉為邑庠生三女適莫旻邵絃任瑞孫男六誠謙謹訥餘未名女五銘曰

人苟有才孰不奮庸何歉於公以過其逢德之在人必

得其壽於公何負不臻遐者年雖不永厥有賢聲矧有  
令子揚于王庭進士甲科郎官清選子道父道大猷斯  
聞孝養有祿亦有寵恩龍章煌煌賁于丘園公之不  
待聞者悼嘆雨露滲漉幽顯無間鳳山之陽我我新阡  
太史刻銘過者式焉

前浙江按察僉事吳君墓誌銘

君諱璘字廷潤姓吳氏吳氏譜可知者自其曾祖益之  
至君之考宣三世皆不仕宣後以君貴封南京刑部主  
事母張氏封安人君自少聰慧過人年十四府尹李公  
見而奇之遣入京庠為弟子員每得其文輒驚嘆曰天

生奇才當為邦家之用遂命子奇與之游從同受業於翰林檢討劉士選之門景泰庚午領鄉薦時年二十有一明年會試賜進士出身授南京刑部主事訊讞之暇益取所未讀書讀之下筆為文語益浩博嘗著志氣論數千言皆發先儒未發久之陞浙江按察僉事聞父喪勺水不入口者三日歛葬盡禮服除再任浙江以繩貪墨植善良為己任一時貪吏有聞風解去者嘗上便民十事大要以正風俗蘇民因為急其言自杭抵蘇纔五百里而立兩鈔關自北新關抵江頭纔十里而立三稅司取利大多吏緣為奸乞裁省之朝廷多行其言而

君猶以為此一方之利也復上時政萬言策策為目六十總十餘萬言出入古今通達事變凡所以維持天下康濟斯民者大略在是時當道有不便其言者忌之以他故解君見任君即日還家以讀書養母為事母性最嚴君委曲承順得其歡心家雖貧甘旨不乏母壽今年八十有三賴君終養而君竟以疾先逝悲夫先是君宅憂嘗結菴園中為讀禮之所後去官居之研窮墳典雖祁寒盛暑手不釋卷至於憂國憂

君之心亦未嘗少釋于懷嘗獻治平演義一書

上嘉其文中貴陳公因而薦之南京守備成國朱公亦

上疏薦君謂有將才可試召用而君又為詩百篇以上閣老萬公當是時豈徒

上將用之士大夫亦期君必用而君亡矣豈非其命哉君學既該洽才亦敏贍凡有著述筆不停揮頃刻數百言立就為詩文亦不煩構思其識量亦宏於物無忤與人言無一語及私臨終猶以生不能事

君以竭吾忠死不能養母以終吾孝為恨其子問所欲言曰吾言止此矣君娶蔣氏封安人生子一人曰大有娶梁氏君年五十有三以成化十七年正月十九日卒卒後二十七日葬都城南某村之原君初號皆拙子晚



號南坡老人所著有治平演義三十卷經畫事宜二十  
卷康濟庸言十卷瓊珠淵海一百卷南坡詩文稿潤菴  
間見錄各若干卷君之卒也其子大有謂子與君同年  
雅厚乃持其舅氏推官蔣誼狀來請銘銘曰

維天生才將以用世其用其舍斯又有數君才雖鉅君  
數則奇平生抱負百不一施歸而著書益以自廣如有  
用我孰此以往訖於擯棄齋志以終終亦何言惟孝惟  
忠我作銘詩慰此亡友於戲君乎可以不朽

南京欽天監監副貝君墓誌銘

貝君諱琳字宗器號竹溪拙叟其始祖立本河北人仕

江南李氏為常州刺史賜錦衣魚袋宋開寶八年吳越  
王錢俶據常州執刺史流之定海雖顛沛中猶服舊賜  
錦衣時人以錦貝呼之孫孟博在明道中舉直言累官  
浙東轉運使故定海稱世胄以貝氏為巨擘焉洪武初  
祖可恒謫隸戎籍來居金陵生二子長永阜君考也君  
自少才敏嘗學舉業且有成曰是僅足以榮身又去學  
象數於司曆何公何止上從之再暮乃盡得其傳遂被  
薦充天文生例除戎籍君喜曰斯可以庇吾宗矣正統  
己巳從昌平侯楊公征北虜至獨石而捷景泰庚午從  
征雲中深入至賀蘭山壬申又從征兩廣累功授欽天

監漏刻博士天順改元玄象示警

英廟召見便殿奏對稱旨賜白金文綺尋陞五官靈臺郎三載給勅命贈永阜如其官封母鮑氏為太孺人成化戊子因災異上言其略曰大君者萬民之父母天地者大君之父母天心仁愛人君時出災異以譴告之人君修德以格天心則災變為祥凶化為吉高宗因雉升鼎耳修德正事終克嘉靖殷邦宣王遇旱魃為虐側身脩行卒能中興周室遂條陳弭災圖治六事其言多有可采庚寅陞監副壬辰改南監時與弟珙南北異處者幾三十年矣至是復同居以舊居狹隘更作新第于

武定橋西明年第中彥嘉瓜駢頭並蒂士大夫以為雍  
睦之應作詩美之君為人負氣敢言人有善稱不絕口  
有過面折之不諱有仕而被誣者力為辯理去官者館  
之而資其歸其所為仗義事皆歷歷可數然其心未嘗  
責報不沽恩不欲背已此其識量抑又有過人者也其  
所刊校有回回曆臺曆百中經諸書行世君自戊戌感  
風疾至壬寅九月三日屬纊凡屏居不事事者閱五寒  
暑而於弟未嘗忘歡於子未嘗失教吁亦賢矣初娶盤  
輿樂氏贈孺人繼娶金臺劉氏封孺人三子翱翔雲翔  
側室陳氏出五女長適南京刑部尚書張公子紡次適

武昌次許聘大理寺副戴君子某餘尚幼珙卜以卒後  
某月日葬某鄉某原乃奉刑部主事伊秉狀介予同年  
揚州都運歐宗德來請銘予素與君交嘉珙之能盡弟  
道而又重歐公之能篤友誼也故不辭為之銘曰  
日官居卿代天工亟咸甘石世所宗象占景測誰精通  
寥寥千載茲惟公出參戎律入獻忠匪徒授時成歲功  
靈臺有曆垂無窮公名與之為始終

承德郎南京工部主事金君墓誌銘

君姓金氏諱鼎字公器先世吳江人 國朝徙中都永  
樂間再徙北京繇武功中衛籍先是其家在吳擅業

播遷之餘日就衰落君父福成銳意興復克勤生事母  
張氏以儉承之生君諸子咸有立志戮力幹蠱卒致富  
美而君在諸子中尤號穎異福成遣入京庠從良師模  
遊景泰癸酉中順天鄉試成化丙戌中進士第擢南京  
工部營繕主事君賦性奇峭加以學術闡其志要當以  
才雄躋顯秩不齷齪俛就功敘比授職為郎又當去  
輦轂下意殊怏怏既視事則又嘆曰留都重地制度缺  
壞司空劇曹職務隳弛吾曷為振起之剔其宿蠹以還  
舊觀亦足以少副委任自是凡訓工飭材程品之定號  
令之施皆君所參酌而工師之素為夤緣稱巨猾者皆

歛戢無敢肆矣三載給勅命封福成如其官母張氏  
妻解氏皆安人君還任未朞以成化甲午二月丁巳感  
風疾卒享年五十有一君年逾強仕未有嗣解安人為  
三置妾曰張氏王氏魏氏張生二女皆幼王年最少君  
之卒也衆虞其有異志王聞之引刀截左耳自誓家人  
亟往救謂耳血尚濡猶幸可完而王竟斷而納之鼠穴  
中矣噫王少艾也無出身後事未可知而持志堅確如  
此可見君之道刑于家抑不徒施之蒞官而已也君平  
生恃才負氣遇事敢為不畏強禦與人交好規人過而  
已有過亦樂受盡言其姻韓都憲雍在兩廣聞君行事

過當輒以書來而君輒出以示人曰韓公之言我當師也今通政叅議邊君鏞冬官副郎張君組尤與君厚善一夕邊與論議曰子某事似訐某事似刻君揖謝曰竊誠過矣顧無他第疾惡太甚爾故君之卒士大夫深惜之而二君悵惋尤甚自邁疾至屬續治療經理無所不至君卒後二十八日其家返柩于北以某年月日葬某所二君又持君之僚吳主事理所述狀來請銘銘曰士占一命亦云遇時一績有成亦非數竒嗚呼公器此又何悲吁可悲者管輅無壽恭叔無後俾為善者懼而弗為嗚呼公器天不可知人不可欺有善必傳繫此銘



詩

遼府紀善封監察御史王公墓誌銘

公姓王氏諱獻字習賢吉之安福人自少明敏有學術以科目自期而入期之亦謂其有決科之才既而七試鄉闈皆不偶正統庚申膺貢入太學辛酉就試京闈又不偶而公去是亦省毋西歸矣甲子再試始占一第授保定安州學正先是為教於安者多諉以北方學者絕不施善教安士亦甘於自棄而不知有教至曠數十年無一人發解而校官亦相繼坐謫者屢矣公至始嚴立法程為陳說先王教學與朝家育才圖治之意安士

知勸力學有成以去取高科躋顯宦者始踴躍乎與南  
士爭奮庸矣丁卯公子齊中鄉舉戊辰辛未兩至禮部  
名皆在乙榜將就職公以詩勉之有自憐白髮長凝睇  
肯信朱衣不點頭之句甲戌齊果第進士公適滿考在  
都下因乞休天官謂公有績最當遷遂陞公遼府紀  
善公取道省毋留繼室侍養而挈庶子平縝輩之荆父  
之愛荆土淳厚饒物產遂問舍于荆之沙市戊寅母計  
至馳歸喪次服除齊已為御史秩滿公遂棄所任職就  
封為文林郎南京河南道御史復往荆凡留沙市者數  
年蓋無日不賦詩酌酒客至必傾倒每會非伶人在側

不成歡成化初齊為河南按察僉事陞副使嘗迎公至  
汴居數月而返往年齊亦以公務至荆省公別去歲餘  
而公卒矣壬辰秋七月四日也得壽七十有七配黃氏  
贈孺人先公三十五年卒葬灌園山之原繼劉氏子男  
七長即齊次蕩慥微平縝緝蕩慥平緝皆蚤喪公賦性  
醇厚遇事則剛介不可奪自為諸生已敦行孝友事有  
義舉率先為之其歸自太學舟至小孤中流忽晝暝風  
暴甚前後舟皆覆公仰天祝曰某之行也進為君退為  
親天不欲全吾忠孝乎頃之風息而舟無恙人以為一  
誠所格一日從齊遊園中見蟻穴竹樹者甚眾齊請以

火燎除之公曰蟻雖微命難以數計因舉宋元憲故事  
為戒里人嘗暮夜投公蓋自行賈歸病不能赴家者家  
人謂納之非利公曰事在濟人利害何恤也竟納之而  
其人夜死里中誼騰疑公利其賄公殊不為動為殮之  
以求其家告焉其家詣公謝且感以為德而誼騰者遂  
息公存心制行大率多類此公初學有領會處即自號  
尋樂及年登七袞更號古稀老人其平生喜為文而尤  
工於詩有集刻梓于家齊遵治命茲往迎公樞歸以某  
年月日與其妣合葬道出金陵因謁予請銘予雅重齊  
仕有雄稱無忝於公又竊念與公同策名鄉榜今三十

年而公不可作矣故不辭為之銘曰

士患不立志用違其時志而有成奚官之鉅庫巍巍王  
公遭時不利其用之未既系公有子猗昔齊封五世葬  
周君子曰仁為正首丘沙市之墟公仕所履灌園之里  
歸藏于此敦本樂生惟公有焉尚有寵休以庇其子若  
孫

常州府照磨正菴俞君墓誌銘

景泰中吾毘陵有賢慕府俞君才識通敏贊郡治有聲  
在郡八年民愛慕之而君以老辭去蓋既去而民思之  
于今又二十年矣乃者君之子霖持君門人兵科都給

事中吳原狀來請銘問君卒何時曰天順七年正月四日得壽幾何曰六十有二而葬于邑西龍井之原則卒之年十二月某日也噫位不稱才壽不滿德造物者之於人果有意乎君少以民俊補邑庠生篤志問學無荒於嬉以敗成業既而三試有司皆不利遂膺貢上國學益飭學不怠久之入試天曹又不利竟以下第銓授常州府照磨士知君者咸為不堪而君無幾微見於顏面曰照磨雖庠顧不可行吾志乎遂單騎赴郡以勤慎自持凡事經幕府者皆磨勘無少縱而且發畫諾以佐守不逮暇日輒就學宮與諸生講論其所發明與旨往往

有博士所不及者君操履廉介布衣蔬食無改故常有  
德之者暮夜懷金為壽君亟揮去然亦不以語人嘗董  
漕徐淮例賫公帑銀為道里費君辭曰吾自有常祿可  
以資費無用是也人於是益賢君先是滿兩考皆書最  
今三載且滿超拜有日而懇懇欲辭去常人士輒挽留  
之天順辛巳會有事赴闕遂疏乞致仕時年甫六旬  
予時亦在朝蓋深惜其去而亦未嘗不羨其去之決以  
君諱文字悉學先世莆田人元季兵亂曾祖諱某避地  
漳浦因家焉祖諱某考諱某號樸菴洪武間以人才徵  
不起母歐氏君弱冠喪母居太學喪父時閩方有寇君

治瑩域不輟訖襄事而後避之大帥統兵至邑境君儒冠謁轅門乞禁戢其衆無剽掠罪止渠魁無濫及脅從者帥皆從之且憐君在疚遺以糗糒器物悉辭不受蓋君家素貧迨休致歸益貧兩居敝廬僅蔽風雨而君居之裕如也士大夫謂君平生自處罔不以正於其卒也私謚曰正菴云君娶范氏生子一曰寧繼孫氏生二子曰霖曰雨為邑庠生寧雨皆卒二女長適工部主事吳起次適徐鳳孫男四龍稷契澤民銘曰  
位不必崇最以成績祿不必厚儉以養德於戲正菴何豐何嗇銘以永存百世無斁



承事郎夏君墓誌銘

君夏氏諱泉字希明江陰人高祖汝賢元江浙儒學提  
舉曾祖善信祖以愚考孟承繼世積德而孟承實大建  
厥家貲累厚富幾甲一邑嘗以義舉授七品散官君孟  
承仲子母王氏生而秀穎少從經師講春秋且有成屬  
以父命代典鄉賦遂棄去之而出理公務然每事必咨  
稟於父間有宜於公府而不能盡如父之意者父怒叱  
之必黽俛順承徐圖許可用能無違於親無戾於公承  
上蒞下一於誠信巡撫周文襄公深器重之父嘗逮繫  
詔獄君往訴於執法動遭楚掠父憫止之曰吾自誣

母徒苦汝為也而君訴愈急卒白乃已人稱其孝自是  
君持門戶于外兄希年弟希濫戮力幹蠱于內生事日  
繁父命分爨而君所析居曰長涇地瘠薄而人鮮少希  
年請還君同處君辭以父命不可於是建橋梁以通行  
者作室廬以集居者造器用以募耕者平權量以求質  
易者減息錢以利稱貸者給服食施棺槨以資窮無告  
而老無歸者不數載總然成聚名長涇市而君居之安  
焉然獨念父春秋高日徃省謁父歿恭兄如父友弟如  
兄亦時徃燕集第卒以父所遺資助其喪兄疾病侍湯  
藥恒竟夕不寐及卒為維持其家蓋君孝友天至而又

輔以學術故能篤厚於倫誼如此元配張氏中歲失明  
敬之無替於初君無子以兄子順為嗣撫而教之無異  
已出年踰半百即以家事付順而築別業於綺山之陽  
構亭榭蒔花卉以招延賓友從容款洽人皆樂從之游  
然面折不能容人過而人亦不以為忤此又其素性諒  
直不苟柔吐剛而信義素孚於人故也君初號甘隱成  
化初發粟飼饑蒙恩授承事郎有官階矣而隱操自  
若居室服御無少易其常度云子男一即順賢而克家  
娶張氏孫男四誠娶興道華氏南齊孝子寶之裔謹聘  
予孫女謹聘通政使司知事朱梅月之曾孫女某未聘

孫女一君壽六十有二以弘治戊申九月廿一日卒又  
明年庚戌正月七日葬綺山新塋順謂予辱有連前期  
奉兵部左侍郎白公所為述事行來屬銘銘曰

維君幼學有志用世弗究於施祇厥父事事父克孝友  
弟恭兄綸理以明殖業以贏戚而宗婣踈而州里推而  
達之曰仁與義義聲仁聞播于邇遐 寵恩是嘉章服  
之華維君甘隱弗渝其操別業之營翩然高蹈維楨維  
榦有子承家有孫纍纍蘭茁其芽燕翼詒謀澤流無涖  
生順歿寧歸藏于此維此新阡有封若堂有欲知君眎  
此石章

顏府君夫婦合葬銘

南京水部副郎顏涇之喪其母吳氏也將啓其先府君之窆而合窆焉乃持鄉人太醫院判周庚狀以謁予銘且曰先君卒時年二十有三吾母生涇甫再暮孤嫠綿力間關閩嶠不能全歸其纈乃用茶毗之法而以函骨歸葬邑西十五里何山之原今四十有餘年矣而墓石久未有刻今不幸吾母考終葬有日敢重以請涇舉進士與吾子沂同年有契分比官留都以鄉郡故又往還予所甚款義不可辭按狀顏氏之先莫詳何許人高祖諱均仕元知廉州曾祖諱仁為平江路達魯花赤遂著

籍焉故今為蘇州人祖諱希誠父諱璋以材諍辟丞福  
安歷上饒新淦三縣有聲績母卜氏君諱鎡字孟春生  
而醇厚讀書敦行誼不效儒生為章句之學鄉長老雅  
愛重之稱顏氏佳子弟君事親盡孝雖賤役不以委人  
福安每退自公輒侍左右承咨詢奉溫清具滌灑久而  
弗懈閩多溽暑君恒以扇侍父止之曰事親之道雖勞  
不恤況茲事無甚勞耶父喜謂人曰吾子孝子也未幾  
父奉省檄督造巨艦于海濱去縣遠君隨行則念母獨  
居留侍則懷父遠寓往來匍匐圖惟兩全竟以勞悴致  
疾而卒正統癸亥某月日也吳氏長洲令族父諱某母

某氏年廿二歸君能執婦道君平時纔廿五淫質賦素  
羸姻黨竊為之慮曰若年少如此一子孩且弱如此顧  
乃欲為久遠計乎曷若改圖吳氏聞之泣曰婦人從夫  
者也夫死義亦當從所以稱未亡人者正以有此孤爾  
顏氏宗祀不絕如綫苟此孤存庶其先不為若敖氏之  
鬼矧兒貌清澈似亦不凡育之有成又安知不為前人  
光乎遂謝膏沐屏家累日以撫孤為事稍長遣就外傳  
嚴程督之而淫亦感奮黽勉問學遂領鄉薦第進士授  
工部主事陞員外郎嘗以初仕 恩給勅命贈君南京  
工部都水司主事封吳氏太安人先是郡邑嘗上其夫

亡守義事 詔旌門為貞節迄今命下姻黨乃服其志  
操而羨其光寵云子男一即涇娶方氏封安人孫男二  
祿郡庠生娶南昌太守同邑張耆女楫未聘女一許聘  
工部郎中常熟瞿明之子某壽六十有七成化乙巳三  
月廿七日卒其葬以某年月日銘曰

厥德允臧卒罹其凶厥嗣孔良式繫其逢教有自承義  
有攸從有賢厥配穆乎清風門闕之旌爵秩之封異渥  
鴻恩其來無窮沾沾小夫謂天夢夢維施之淺奚報之  
豐我作銘詩鏤之幽宮以詔於冥以警於蒙

胡允禧墓誌銘



允禧姓胡氏諱麟允禧其字清澈其別號也常州武進人先姑夫泰然翁諱安之子前禮部尚書贈太保謚忠安諱潑之從子先姑王夫人生男皆不育翁年五十猶無嗣夫人憂之勸納少房姚氏而允禧生允禧質厚而材敏年數歲即知學然翁已先立嗣子麒俾務學術遂俾允禧治家事曰吾老矣幹蠶不可以乏人久之麒學成而不祿其娶丁氏婦亦卒無子翁姑與允禧娶期得宜男者得郡博臨海王公臣女數年生四男子皆玉雪可念翁每携以自娛而且樂允禧之養優游晚境日躋大耄有司歲聘為鄉飲大賓嘗援詔例請加冠服翁

皆不能辭也年九十三考終正寢允禧居喪盡哀且重  
哀王夫人久逝曰吾何以報劬勞也蓋夫人雖有女三  
人而撫育允禧暨允禧之妹皆極恩義允禧為人恬淡  
寡嗜好居家不翦翦為利處鄉里不豪佚怙勢事親之  
暇常與二三知己相還往欵洽水邊林下匏樽野蔌袒  
裼箕踞相忘爾汝蓋其平生最喜飲其量既豪而性復  
不羈凡召無不徃徃無不醉與論世事瞠目無語言富  
貴利達輦蹙若將挽已陶陶然不知天壤間復有何樂  
可以易此也予聞之古人不遇於時者徃徃託於酒以  
自放若嵇阮劉伶之徒卒能全其真以無累於俗然允

禧生際明時出自華胄負用世之才繼承家之緒苟  
出其有功名富貴可以立致顧乃遺落世故以沉酣於  
酒此其意有不可知者予頃年東歸屢致允禧浮之太  
白頽然便醉與語不應既乃張目謂予兄誠顯貴矣抑  
未知酣於聲利者孰愈予酣於酒也予愧其言不能答  
允禧年四十三以成化甲辰四月四日卒其先世見予  
所為翁墓誌其子長吉娶丁氏承吉娶唐氏同吉娶潘  
氏順吉丙午十二月一日葬孝仁鄉周莊之原先太保  
墓左吉等謂予於允禧有中表之義來乞銘銘曰

猗允禧生慶門賦材良植行純服幹蠶儉而勤力養親

孝彌敦略世故謝俗紛樂於酒全天真嗟古人孰知聞  
陶阮流伊其倫年未艾奄沉淪觀大化招遊魄孝仁鄉  
周莊原從先兆起高墳銘好辭勒貞珉壽不遐名永存  
衍餘慶庇後昆

亡孫昇壙銘

昇吾孫也初名時後更名昇字時暘生十九年以成化  
丙午八月世日卒于其父沂北京官舍初沂舉進士官  
祠部主事昇甫八齡即從其母楊氏之京師沂累遷員  
外郎郎中曹務委昇雖遣從師遊而督勸不時予懼其  
且無成也而昇乃克自奮勵讀書攻文窮年兀兀罔敢

玩愒戊戌壬寅乙巳予三入朝每見輒異蓋不徒學有  
端緒至於脩身履行亦動循矩度予喜謂沂曰吾後其  
昌矣今年秋沂以書來告昇病且劇藥之弗瘳予憂之  
去是三月而凶計竟至予與妻相向哭不勝哀又閱月  
其母楊携其柩歸毘陵以十二月丁酉祔葬于裴巷村  
先侍郎府君墓左昇聘顧山周氏女不果娶弟一人曰  
昇女弟一人昇賦性閎敏而立志篤誠自少無子弟之  
過旣冠有成人之度使天假之以年此其所樹立殆必  
有可觀者而今亡矣吁其可惜也夫銘曰

宜壽焉而殤也宜福焉而殃也彼蒼者天何茫茫也賢

顏盜蹠果孰為短長也爾而有知其無傷也吾與此珉  
以示爾於不亡也

思軒文集卷之二十一

一

思軒文集卷之二十一

墓誌銘

都督同知沐公夫人賈氏墓誌銘

榮祿大夫右軍都督府都督同知沐公瓚既卒之九年  
其夫人賈氏亦卒弘治庚戌閏九月十六日也享年五  
十有一明年辛亥公從弟鎮守雲南太子太傅黔國總  
戎公遣人歸其喪于金陵以是年十二月庚申葬江寧  
縣長泰伯鄉先塋與公合兆黔國且授使者以葬必求  
顯者銘公從父七公子倫乃奉四川布政司叅議朱貞  
狀來請於予夫人廣平邯鄲世家父諱銓都察院左副



都御史母某氏夫人性淑婉閑閭範父鍾愛之擇配甚  
嚴比官雲南布政而公之考贈右都督僖以媒妁來曰  
是無以易此矣遂歸焉夫人敬養舅姑禮相賓祭和惠  
姻黨恩逮僣從益體貌端嚴禮度整齊處富貴若故有  
而綜理內政又若其素閑習者公某宜之天順戊寅公  
奉勅充副總兵鎮守金齒威鎮邊陲化行徼外蠻夷  
革面吏士奉法三數年來朝廷無南顧之憂者以有  
公在鎮而公無內顧之私者以有夫人之在室也賢聲  
上聞贊書寵嘉命服有煒族親交艷而夫人愈自抑畏  
益勤相助成化壬寅公歿于鎮銜哀治喪執節自誓教

育諸子俾嗣先烈子長曰誠以蔭嚴雲南左衛指揮僉  
事陞都指揮充叅將鎮金齒先卒次曰謙次曰詳嚴都  
指揮繼鎮金齒次曰諫仲與季皆蚤夭孫男一曰崐孫  
女二長未聘次許聘南京守備太子太傅成國朱公之  
孫麟子嘗讀詩韓奕曰汾王之甥蹶父之子碩人曰齊  
侯之子衛侯之妻邢侯之姨譚公維私詩人形容其族  
類之盛殆無以加夫人既為都憲之子都督之妻而公  
之曾祖黔寧昭靖王伯祖定遠忠敬王祖考定邊武襄  
伯叔祖駙馬都尉伯黔國榮康公又累世貴寵而夫人  
為之婦其勲閥世望之輝華顯赫亦何讓於古哉敘而

詩之以媲美前聞夫豈不宜其詞曰

桓桓上公國于黔世秉節鉞雄南滇永昌之鎮功在邊  
宜家重賴邦之媛鸞書五色金花牋錫號介賚方便蕃  
傷哉中道殞所天誓保全節歸重泉韓姑燕譽莊姜賢  
芳猷百世同永傳

太恭人彭氏墓誌銘

太恭人安成彭氏諱蘭嬌贈中憲大夫南京太常少卿  
劉公祖昭之配今南京太常少卿宣之母劉邑中鉅族  
中憲之祖學三府君篤行尚義樂分施而恥封殖姻親  
族黨多所仰給以及其子孟九府君循用是道一時聲

稱籍甚太恭人始歸遭兩府君喪相其夫克修先業不  
廢義舉永樂壬辰為外親連構舉家謫戍盧龍資產悉  
籍于官戊戌太恭人從夫歸自謫所佐姑王氏再造厥  
家朝營夕辦雖無宿儲亦隨其力以應內外之求未幾  
中憲辟典鄉稅太恭人私相謂曰吾家新立不宜科擾  
以重歛怨至出已有貸償逋賦盖人雖德之而力愈困  
矣宣德壬子中憲歿太恭人侍姑盡孝遣宣兄弟就學  
督責之甚嚴止統丁卯宣代戍盧龍掩泣送之竊怪嘆  
曰吾兒何遽止此乎景泰庚午宣中北京鄉試第一人  
報至悲喜交集明年辛未中進士授翰林編修三載給

勅命封太孺人命下益以悲喜蓋慶劉氏之有後而傷  
中憲之不逮也天順戊寅宣歸省迎太恭人就養北京  
成化庚寅宣陞今官又奉來南京又三載給 誥命加  
今封太恭人生有令質善容止寡言笑配適中憲無違  
德既而孀居執節綜理家政無遺緒蓋先受教於賢父  
母又及教於賢姑氏故其平日自處豐約不渝其守勤  
儉無改於常能若此子二人長紹祺先卒次即少卿君  
宣娶王氏累封恭人女三人孫四人慎秉經秉常秉善  
太恭人壽八十有八丙申正月廿八日終于官舍宣銜  
哀赴闕陳乞守制

上憫之命禮官諭祭宣歸以某年月日與中憲合葬某山之原謂予同年雅厚戒其從子翰林編修戩具行述屬銘太恭人誕辰在月正元日予與宣同宦兩京每於是日朝賀禮畢偕二三知己升堂拜母必命宣張具樂客蓋歲以為常今年元日雪寒益命具酒肴苛留諸客皆霑醉予於是竊慕太恭人之福壽彌臻少卿君之孝養篤至皆人所稱頤而不可必得者而今已矣然則序而銘之以垂耀將來予顧何辭銘曰

易重家人禮嚴內治家步多艱治尤不易維太恭人是究是圖其德女婦其才丈夫植什支傾振窮恤匱無隳

其基而傷其類式穀之教有續孔良奮庸于時以閔厥  
聲荐沐寵恩茂膺蕃祉盛德之報庶其在此勒銘其  
藏以告永世

宜人趙氏墓誌銘

宜人趙氏諱恩工部營繕郎中毘陵段君伯誠之配前  
刑部侍郎默菴公之冢婦年五十四天順六年壬午十  
月二十日卒于京師明年二月伯誠將歸其喪戒其子  
瑜來迎謂予宜為銘以授瑜使刻而藏之永樂間默菴  
為山東叅政其僚有趙叅議良者越之餘杭人其治家  
有法默菴慕之而聘其女是為宜人既歸果明識知理

道善相其夫尤善事舅姑久之默菴貳秋卿于南都以  
終時太洲人葉氏尚在堂伯誠兄弟奉之與其母盛淑  
人歸常州家既無貲而太淑人且垂老宜人日脫簪珥  
具甘脆率諸娣姒為母歡使不以貧故動其心而宜人  
亦安之若不自知其勞且竭也正統初伯誠以蔭入太  
學拜車駕主事從征麓川去家二十年而盛淑人亦老  
矣宜入事之如事太淑人而所以為養則又以伯誠祿  
入得少紓自默菴歿伯誠能世其官以無墜其家者雖  
外有諸弟在抑亦有賴於宜人之在內也宜人以夫貴  
初封安人進宜人生二男三女既有室家人謂宜膺壽



考以享有子婦之養而宜人卒不待以死嗚呼謂非其  
命也哉男曰璇曰瑜讀書有學術業女許嫁徐瑞何傑  
徐生瑞予甥也為邑庠生璇卜以癸未某月日葬武進  
縣某鄉某原為之銘曰

吁嗟宜人古賢婦兮嬪于名門德之偶兮勿怠勿逆事  
二母兮其峙雖單養則厚兮恤族孔仁均所有兮皇有  
顯報曰胡考兮胡不百年終六九兮委陟隤休昌厥後  
兮銘以昭之圖不朽兮

宜人何氏墓誌銘

宜人何氏諱妙賢前瓊州守徐公諱鑑之冢婦封春坊

庶子兼翰林侍講諱琳之配今少詹事兼翰林侍講學士溥之母也以子貴初封孺人加對宜人壽七十六歲化十三年五月己丑終于正寢計聞

上念溥舊學賜葬祭命給驛馳還皆異數也溥歸具事狀戒其弟淪來南雍屬銘何氏世為宜興令族父達為人長厚母夏氏卒宜人纔九歲哭泣過哀事後母曲盡孝道雖遇之非理不敢疾怨乃更為後母所愛年十七來歸姑吳氏喜曰吾得孝婦矣時瓊州以事逮繫詔獄庶子公將往省母止之曰爾婦未免身勿亟也宜人曰父母有難尚暇顧妻子耶促之行凡三年不返家事皆

身任之而於事姑尤謹姑每憂形於色百方譬解日侍  
左右至夜分安寢乃已宣德間歲歉有盜夜捶其門宜  
人亟起將扶姑避後圃惶惑中失姑所在復趨至中堂  
求得之盜退諸婦曰何輕率乃爾脫遇盜何以自免婆  
婆老年必不忍加害也宜人曰正慮姑老驚悸成疾爾  
我何足恤久之瓊州卒姑亦卒二庶姑尚少事之一以  
姑禮庶子公治家甚嚴宜人事之終身相敬如賓蓋雖  
老猶在中饋公每教子弟程督課業宜人亦從旁誨諭  
之及溥登第仕于朝凡再省親庭所以致誨諭於溥者  
益加諄切溥丁家艱服除當赴闕以宜人年高不忍去

宜人曰汝受朝廷厚恩當盡忠圖報我有爾弟及爾長兒在奉養不乏母以我為念也溥不得已辭去  
陛見之日特旨進陞今職日見信任所以錫寵於其親者日益隆渥而宜人不待此

上所為優加恩典有非尋常之可及也宜人天性恭儉處族屬和而有禮居室無妬忌之行自奉無華靡之飾推所有以散施於人雖多不愜其平生善行多類此子四人長即溥次濟淪澍四女長蚤卒吳吉蔣蘭吳經其次女壻也孫男十五人女六人溥卜以是歲十二月壬寅奉柩葬瑞雲山之原銘曰

孰為婦道孝義不渝慈教有成是曰母儀婉婉宜人令  
德咸備巍巍詹事生逢盛際荐歷華近春注日隆揆  
厥本源以錫今封象服煒煌光於閭閻榮終之典尤異  
常品瑞雲之山茂木高墳掩詩于幽為詔後昆

宜人楊氏墓誌銘

宜人楊氏南京鷹揚衛指揮均之曾孫女都指揮僉事  
得廣之女也母某氏宜人德性沉靜寡言笑慎舉止非  
父母有命不輒至中庭嫻族稍踈遠者至不知其在室  
年十九以選歸戚里王氏為南京錦衣中所正千戶克  
英之妻都督同知贈瑞安伯某之介婦都督五子其仲

諱克安者今

皇太后父也其季為克英兄弟同居家庭雍睦而宜人處妯娌之間侍舅姑之側柔遜以和敬養不衰上下稱之無間言焉成化癸巳都督自顧暮齡仰給者衆乃命諸子分財異居宜人至是又相克英以儉以勤用致饒裕因間請曰人之娶婦上以承宗祧下以繼胤嗣也君家貴盛胤嗣宜蕃而妾故多病生子不育為君之慮宜早置妾克英不納謂之過計宜人言之至再至三意誠詞懇而後納焉既又謀於克英焚香籲天祈早得嗣自壬寅迄戊申六十七載間累生三子宜人撫之仁慈備至

思軒集卷二十一  
八  
提携顧復無異已出賢聲播聞

皇太后乃賜衣履固篤親親亦嘉寵之也往歲丁未以  
克葬貴給 詔命封宜人居無幾何而邁疾卒矣弘治  
改元六月廿三日享年三十有八子三人漢潮澧卒之  
年九月十日葬江寧縣鳳臺岡祖塋之次其狀則光祿  
少卿張君賁所述予按之為之論譔而系之以銘銘曰  
先王教遠習俗媮人懷媚嫉憎匹仇爭妍妬寵身為謀  
名雖為士妾婦流賢哉宜人誠好逮女中丈夫乃其儔  
樛木逮下德最優恩施均一猶鳴鳩年齡有已聲無休  
斲石薦詞款諸幽

宜人陳氏墓誌銘

宜人陳氏順義人父智嘗事

太宗皇帝于燕邸為儀衛正有名稱于時儀衛四女宜人其季也永樂中歸保安衛千戶王公璘為繼室公為人豪俊治家處官一於自任無少顧藉然事或詭正宜人必諷諫之溫言婉容初無抵牾卒亦不遂其非也公先室程生五子孽子三宜人能均所愛比生子愛之眦諸子不加多也內外姻戚咸交口譽宜人謂惟義之從不私有我其為婦也順以正其為母也愛而公可謂賢矣公歿子曦嗣宜人勉之盡職睦姻族時祭享不諉以



邊鄙使棄禮滅義子陳性嗜書然所與游多武弁士無  
與談文墨者宜人嘆曰吾聞古賢母教子有三徙舍者  
吾寧滯此而不思所以處吾子乎即以家事付冢婦  
携陳來京師使就學久之陳被選為鴻臚序班陞中書  
舍人養有祿食曦雖乘障亦時戒仲氏來展省致甘脆  
食物不替天順七年五月二十八日宜人以疾卒壽七  
十有三明年甲申四月七日葬都城東南東高村之原  
前期諸孤來迎宜人扼與公合葬樊山懼遠而弗克也  
則又來會葬男曰曦今為保安衛千戶曰暄曰旻曰暉  
曰暉程出曰昕側室褚出曰昉蔡出宜人所生即中書

君陳也娶董氏孫男四佑儒俊傳銘曰

吉甫見疑伯宗及難伊孰如母而從婦諫有赫王公臨  
事勇斷宜人相之義以弗畔匪子不殊不蔽於私以長  
以教子曰母慈或顯以文或揚以武哀榮始終是為受  
祜東高之原我銘其阡公不同封同永於傳

孺人倪氏墓誌銘

鄉校生吳門張澤喪其母倪氏之七月匍匐來南京乞  
予銘葬且致其父養正之命持其師兵部副郎范誠夫  
之狀泣再拜曰幸先生矜而畀之銘存殁大惠也孺人  
諱淑貞蘇之長洲人幼婉順為父原讓所憐愛辭不姻

富家子時養正業醫里中新有才名而妻陸氏亡原讓  
遂以妻之曰此山公之所以奇叔寶也先是養正之父  
以名醫被徵從中貴人使西南夷累歲未返家累滋重  
諸弟幼未更事力持門戶使不至落莫而孺人相之以  
儉以勤殊不以窮約故有不豫色然非徒自檢實安之  
也故養正得究心於醫讀書明脉理以李明之學治疾  
無不效一時吳下稱醫之良以之為巨擘焉位通顯家  
高貲者賓致之惟恐後而酬應之與寒士無異辭受取  
與悉以義裁至是諸弟亦漸克有立子姓誥誥而資用  
日趨於厚富矣孺人履勤儉如初服御無改於常閱三

十年如一日成化丙戌二月十四日以疾卒壽六十有  
六是歲某月日葬某鄉某原正統間予嘗以疾訪醫至  
吳養正治予疾不責報予感之別二十年未嘗不往來  
於懷也近來南都相見道故舊曰吾老懷不減於昔自  
吾婦喪粗不能自遣爾君知我者敢以圖不朽之託吾  
婦雖死猶不死也予諾之未幾而澤來是宜銘銘曰  
黜篡組以為工約不虞於歟也躬布素以為飾豐不踰  
於羨也執德有恒而志不加貶也豈女婦所能固君子  
之選也若夫以全其歸彼孰為之戩也以祚厥胤其去  
此而之顯也剡而不舍殆斯文之表見也

姚母黃氏墓誌銘

成化二年七月丁亥仁和姚瑄之母黃氏卒壽六十有四九月乙未葬江寧縣安德里先塋前葬瑄持其鄉人南京禮部司務項麒狀來請銘姚故杭士族黃世為姑蘇人永樂初以間右徙京師居相隣遂締姻以歸為思讓婦黃氏執婦道殊謹事其姑敬而順滑甘裘葛之奉必躬治之歲時祀享尤以勞自任閱四十年無少懈隣嫗王氏者患背疽且死亟言之思讓迎醫治之得不死族里中或貧無所給孤獨無所歸者皆命其子賑施之至於御婢僕亦嚴而有恩居常不假以辭色然撫育周

至懇懇焉惟恐有不得其所故家政斬然而人稱之無  
間言子男四長即瑄次珉玘璽玘由太學生任郟城訓  
導女三孫男五榮茂蘭芳蕙嗚呼禮教不行於後世久  
矣士嘗學問取功名以軒輊一時宜若可以範今而垂  
後者比其歿也考其行而於所謂脩之身行之家者或  
寂無一善可紀況婦人女子而欲望其卓然不為耳目  
所濡染者誠不易得也如黃氏者雖不必上媲古賢婦  
而視彼流俗豈不為猶賢矣乎是宜銘銘曰

維皇降賦靡不臧人偽滋熾理桔亡士鮮一行扶綱常  
予於女婦安所望有婉姚母孝且良生事盡力死奉膏

積誠曠歲無怠遑族姻懷惠耿不忘賢名百代期流芳  
直詞深刻存幽堂

孺人吳氏墓誌銘

南京留守左衛百戶俞文德之母孺人吳氏卒禮部主  
事沈鍾為論謨其行文德持以告予曰葬有日矣丐公  
一言以銘之吾母平生所以履諸身者無愧乎女誠左  
右吾父辛苦立門戶無愧乎婦職長育吾子女孫曾無  
愧乎母道者皆賴公以傳不朽文德厚於親者也銘可  
辭乎孺人諱善智先世維揚人笄年歸俞彥清氏維揚  
兵衝之地洪武中民雖底寧而蕩無資業孺人相厥夫

備歷難險以迄有完居而彥清且逮錄尺籍當入衛京  
師復徙居朝陽門外雙牌岡之陽以勤儉再造厥家其  
難險尤甚於昔永樂初

太宗文皇帝靖內難彥清既出事戎行孺人獨負幼子  
竄匿城中居民家以貞諒自誓比詔下休兵夫婦復  
相見而雙牌之居已燬矣孺人自是與彥清語惟以生  
全自幸至於成敗得失則絕口不道久之諸子既長知  
稼穡艱難好廢舉治生而家業日趨於富饒以鉅賈稱  
雄江左孺人散所積以周貧乏無虛歲景泰中文德輸  
粟助邊餉遂寵授今職李文貴亦輸馬於邊有冠服



之賜孺人喜曰吾子知用財以義吾無憂矣彥清年八十有三先卒孺人體素豐無疾頃以三數日不食竟卒成化二年九月戊寅享年八十有九卒後十二日祔葬上元縣惟政鄉萬石墩之原子男三長文顯早卒其次即文德文貴女二長適陳敬次適百戶吳忠孫男六經綸縉紳綬纓女五曾孫男三銘曰  
墳之也而實培之摧之也而實綏之吁嗟孺人維德之基号

宜人周氏墓誌銘

揚州都轉運鹽使司運使歐君賢既奔父喪歸蒼梧葬

已來南京而其母宜人周氏計至君甫卽就道將歸以  
辛丑某月日啓其先公之窆于梧城之北而合窆焉謂  
予其同年友也屬為銘君自景泰辛未登進士第擢行  
人司行人歷戶部員外郎郎中以至今官皆籍籍有聲  
人謂其本於父教而予與君游又知其出於母教者有  
素也蓋君蚤喪母曹氏宜人其後母也方其孱昧提携  
顧復過於所生比長有知訓誨諄切期於有成雖宜人  
亦忘其非已出而君所以孝養之亦不自知其非出於  
宜人也此其所以克成才美荐歷華要為時聞人豈獨  
嚴訓之所致哉宜人梧之宦族父諱通母某氏宣德間

歸歐氏為封戶部員外郎廷綱繼室逮事其姑備極甘  
旨相廷綱勤於治生宗族上下咸稱其賢又非獨賢於  
為母而已也宜人為歐氏婦五十年既教育其子賢又  
教其所生子良成化戊子亦領鄉薦從其兄于仕途二  
女長適池州府通判梁繼本次適郡庠生李萼皆宜其  
家蓋與戶部偕老以享子女之養荷 朝廷推封之典  
安富尊榮卒登遐者以卒成化庚子十一月十二日也  
春秋七十有一銘曰  
父非吉甫子非華元履霜之操古有名言子騫大賢方  
進名相剖冰之感今何足讓

帝命不僭天鑒孔昭壽祉駢臻綸音寵褒幽室全歸蒼  
梧之野太史作銘為諡來者

金孺人孔氏墓誌銘

孺人孔氏諱妙清金陵人生而慧朗服勤女事剪製縫  
紉不煩姆師董訓父懷惠母李氏憐之時松陵金仲達  
繇籍牧圉與懷惠游而其子孟平娶婦朱早卒遂繼聘  
孺人蓋孟平幹敏謹飭尤為父母所愛居常屬以家事  
比得孺人遂併內事付焉孟平自少有志四方至是遨  
遊江湖閱歷歲年自壺以外酬應百務孺人亦無任之  
矣宣德初孟平既倦遊思返乃命子鍾代役而携孺人

歸松陵經理先業闢田築室月底衍裕內相之功居多  
成化丙戌歲儉子鐸將發粟佐縣官以告孺人曰此吾  
志也遂輸如甲令授七品散官至其平生所施予如糶  
貧飼飢之類殆不可殫述使盡聞於官亦將有不勝旌  
者矣孺人四子曰鍾曰鑑朱出撫之甚慈比卒哭之過  
哀曰鐸曰鎧孺人出孫男十六洪亦輸粟為義官茲任  
南京牧馬所百戶溥濟淳滋瀚澄澤溶浚濡淮沛瀛注  
孫女十曾孫男十六璠璫瑛瓚琪瓊璧璽珮璵璣璉  
璘珪璋曾孫女十玄孫男一孺人壽既高資產既埒封  
子姓既克家孫曾滿前既秀且賢歲時節序燕慶駢羅

鄉人聚觀嘖嘖稱嘆曰孔孺人可謂盛福也已然而孺人每自抑畏訓戒子孫嘗曰爾等宜敦親睦族以承先志積善種德以綿世澤庶幾可以保有今日於是識者又咨美之孺人年八十六以成化辛丑十月十五日卒鐸鎡謀築新塋于巨字之原繚以石垣樹以松杉營之三年而成舉柩窆焉甲辰八月廿一日也前期鐸具事行介予友汝夏官行敏來請銘銘曰

有德有言有祉有年蟄蟄滿前子孫曾玄膴膴高原考卜新阡銘以永傳來者式焉

華孺人關氏墓誌銘

無錫華文熙之妻孺人關氏之卒也華之族相與謀曰婦人之行以順承夫以孝養舅姑以敬奉祭祀以慈教子姓以和處娣姒以義接姻黨以禮待賓客以惠施隣里舉是數者孺人幾於備矣然而節以壹惠古人所慎曷最其行而以賢孝稱之衆曰諾文熙於是命其弟文高撫爲事狀以授其子塾來請銘焉華氏錫舊族其先世見子所爲山桂處士墓表山桂生守方守方生炯字文熙既長而賢將爲授室聞長洲關公澍有女亦賢遂求聘爲冢婦孺人年十七來歸時守方上事二親下撫四弟一門三世族衆事夥酬應外內日不暇給孺人實

相其姑顧氏以周旋其間孝敬不衰勞苦不恤事諸尊屬恭而有禮諧於諸娣謙不伐善蓋惟一秉勤誠無事矯飾而上下宜之久之守方謝絕世故罕與物接文熙遂幹蠶成家出持門戶閱四十年而內無隙業外無廢事實賴孺人以規過輔德不啻益友之相資也諸子有識教之甚嚴嘗曰與其愛之孰若勞之與其掩覆其過孰若使之無過用是諸子亦祇服厥訓無敢為非義者先是姑有疾孺人侍之勞憊比卒而哭之過哀或勸止之曰吾姑之亡由哭姑成疾吾遑恤吾生也哭之愈哀遂成疾時其舅亦屬疾孺人聞之乃呼天曰吾即死願



以餘筭益吾舅因泣下霑襟鬱鬱不食而卒既而舅疾  
果愈果延齡人稱其孝孺人二子長即塾以入馬助邊  
拜章服之賜次基一女適范輪庶生子堅孫三男德康  
繼康安康孺人年五十七以成化癸卯八月廿四日卒  
甲辰某月日葬其里西壽山之原其姑墓左銘曰  
婦德維賢婦道維孝姆氏教弛孰輔而告有泚孺人令  
儀夙成主壺嗣承厥有賢稱孝有錫類姑亡而毀舅疾  
而籲之死不悔人孰無死所貴有聞壽雖不遐其名永  
存西壽之原歸安于此視銘考施實維有子

姜孺人徐氏墓誌銘

予友金學錄德昭近過予道其姻姜縉之賢曰縉勤儉  
治生致家豐羨以孝養二親具甘脆問寒燠親心樂焉  
同臻壽老乃者其母屬疾縉衣不解帶侍湯藥者踰月  
而卒毀瘠摧頓哭之過哀曰縉生不能遂顯揚歿而得  
儒先生一言為母榮斯幸也予聞之而有感焉明日德  
昭以縉來衰絰纍纍持狀奉幣且泣且拜予既念德昭  
之言而重哀縉孝遂不辭為之序曰孺人諱妙慶姓徐  
氏其先吳人洪武中厥祖徙京師今為應天上元人父  
道忠母顧氏孺人生而勤敏笄年歸姜德孚氏姜系出  
富陽與徐遷同時居相望而孺人又嫻美德孚室家宜

馬德孚幼失父母孀居守節孺人養之使忘其孤嫠德  
孚有二從子曰賢曰賓亦早孤長育之且遣賢為京庠  
生學成而不祿而賓亦繼卒孺人始覲其成立終憫其  
天闕無所不用其情也其舊居在府治之西當甲戌歲  
儉時里中人多賴以濟其平時賴之以周貧窶者尤多  
比遷新居則舊里人戀戀不能舍去孺人素多疾嘗謂  
德孚宜置妾德孚以有子辭而孺人固請而德孚固辭  
不聽噫此皆其行之卓卓者也子一人即緡娶許氏孫  
二人楷聘羅氏杲未聘孫女一人孺人壽七十八以成  
化乙巳三月五日卒閏四月廿二日葬江寧縣新亭鄉

祖塋德孚今年壽七十有五他無媵侍於是益悲悼  
人而差無以待老亦可哀也已銘曰

存既壽其齡歿亦壽其名此孝子之情嗚呼孺人雖死  
其猶生

鄒孺人華氏墓誌銘

時予以戶侍召赴  
闕銘作于高郵舟中

無錫鄒顯之之子謙將葬其妻孺人華氏乃請命顯之  
奉其舅錢文狀來乞予銘孺人諱某先世南齊華孝子  
之裔洪武初由隆亭徙延祥之戴湖高祖仲諄曾祖思  
濟祖守方父文輝母錢氏華家世務農重穀富厚甲于  
鄉邑而文輝酷嗜儒文教諸子以經訓孺人自少亦習

聞禮義筭年來歸孝謹和惠亭舅姑克執婦道蓋鄒系  
出宋吏部侍郎忠公其子孫勤於生事累葉蕃盛至顯  
之益加封善持盈以儉節飭子姓而孺人克相于內宗  
族稱其順備恒以謙嫡母錢蚤世不待養為憾助祭先  
祠必豐必潔而自奉簡素日用所須無少干於掌計閨  
門肅雍間以外不聞言笑聲居五年如一日謙性固執  
每以䟽通勸之而夫亦樂從無過舉焉顯之方以得賢  
婦為慶而天奪其年年二十五竟以疾卒孺人三女長  
許聘華其餘尚幼其卒以成化丙午六月十二日明年  
四月十六日葬泰伯鄉塘莊西寧山先塋謙雖哀其婦

而嫌於卑且歿於少不敢厯儒君子銘雖銘或祇敘世  
次紀卒葬歲月而顯之不然曰顧何以慰死者之靈而  
塞生者之悲爾舅錢君有文宜為狀太史王公吾姻也  
其言必傳世行後宜為銘爾其圖諸謙來告予以其故  
予故不辭而為之銘銘曰

產世胄兮嬪慶門顏薜華兮質璘霽修婦職兮躬儉勤  
隕閨則兮奄沉淪咎安執兮歸蒼旻哀孰告兮勒翠珉  
壽不遐兮名永存後百世兮徵斯文

楊孺人睦氏墓誌銘

錫山處士楊叔璣之配孺人睦氏之卒也其子維為太

學生聞計且行乃介予姻戚虞持其鄉人大理司務李  
理狀過予請曰天降酷罰先妣奄終維後有傳音微弗  
泯願先生不鄙而賜之銘此家君意也予諾焉未及為  
而維行矣頃者復以書來言曰北域既營遠日斯卜重  
惟不朽銜恤是圖幸先生毋辭而卒俾之銘此又維諸  
孤之志也蓋予嘗與叔璵之兄都憲叔璣其季氏郎中  
叔獻同朝而予兄廷彥與子沂又兩倩君家既戚而故  
竊嘗聞其內治乃為之銘曰維楊氏世為無錫聞家故  
多儲侍而叔璵幹敏益用封殖宗族稱義鄉閭頌德亦  
謂其有內相之賢孺人之謂也先是叔璵之失其偶張

氏也久難其繼若考封員外郎宗海母宜人朱氏頗以  
為憂會永人有以孺人來議者矍然喜曰是非潤所稱  
名閼睦氏乎蓋系出漢議郎弘國初有諱某者官千  
戶始自丹陽遷京口父諱某母某氏生孺人性篤孝善  
事其親無故不離親側里宦族有來聘者輒怫然曰吾  
忍去吾親而事他人之親乎雖其親亦不可強處室幾  
三十禩矣而楊氏聘至其季父諭之曰若知以奉親顏  
為孝而不知違親令為不孝若必守其志則無夫婦廢  
人倫而人之類息矣若苟從吾言則門戶相望年德相  
當殆無有逾於楊氏賢於叔璵者也會其親亦固命之



遂于歸焉孺人事舅姑如事父母友娣姒睦姻族必無  
失其歡奉先祠必齋祓嚴事治宴會必洗腆供具御妾  
媵臧獲必均賚予而無忤忌率侍婢執麻枲必身先之  
不自求逸豫先張氏遺幼孤二弱女一撫之無異己子  
以至有室待之無間己婦然而訓戒之俾亢身亢宗亦  
不以非己出而少貸也成化丁未之歲孺人忽遘疾猶  
諄諄諭諸子以平生不敢叛禮惟恐辱吾親壞爾父家  
法蓋言不絕口而目瞑矣是歲三月某日也壽六十五  
子四男綱娶吳氏純娶陳氏張出維娶朱氏孺人出經  
出自別室女四適朱錦武進縣學生趙昌齡王璐國子

生陳符孫男九孺人卒後八月某日綱等奉柩葬其鄉  
某山之原銘曰

有淑女孝义留於行有婉婦順卒禪其成言言二宗巨  
閼高薨有繼有承有閼厥聲厥胤繩繩施于孫曾後有  
考者不在斯銘

亡姊孺人王氏墓誌銘

與姊之夫知略陽縣致仕徐君貴昇以書來告曰子之  
姊葬有日矣子宜銘與受簡泣曰吾尚忍銘吾姊也吾  
同氣三人姊最長與與兄廷彥空皆後衰門寡祐往年  
吾兄歿猶幸與姊相守以老今吾姊又歿吾尚忍銘吾

姊也姊病吾不能視饘粥姊之喪終矣不能不除季路  
大賢也吾何敢望獨不能如徐懋功乎顧乃懷祿不去  
而贈舍之不親窀穸之不及吾行負古人吾尚忍銘吾  
姊也雖然孺人之行賢明貞淑長於女稱於父之族成  
於婦譽於夫之屬蓋非文無以傳遠非俱無以致詳遂  
按淚為之序曰孺人幼有令質不煩姆訓刺繡縫紉之  
類皆不學而能皆精巧過人終日坐一小閣足跡未嘗  
涉戶外先考兵部府君先妣朱太宜人皆鍾愛之曰是  
女不凡足必為嘉耦徐故比隣貴冑早以才偶有名遂  
納聘焉時其父彥真已歿故所業醫棄之而業儒為邑

庠生取科第未成而家益落資用匱乏孺人鬻簪珥以  
給內外之費養其姑曾孺人極甘旨之奉而自澹泊  
勵志勤苦無怨言德色貴昇安焉得以專志於學正統  
辛酉領鄉薦壬戌會試中乙榜授山東城武教諭迎其  
母携孺人以去校官祿薄孺人撙其浮冗祗以為奉姑  
費而貴昇獲究心職業以教有成績用今工部尚書王  
公薦陞鄆城知縣鄆接境城武既便迎養令所得祿加  
豐孺人差以自慰而曾孺人以耄老思返故土遂奉以  
歸侍養益至居三載終于正寢壽九十有一比貴昇聞  
訃歸而歛葬之需室廬之葺皆完美無遺矣服除復從

官漢中之略陽未幾謝事馳棧道浮泯江跋涉數千里  
閱數月而至至之日適先妣太宜人襄事之前一日與  
臨寔焉孺人撫棺大慟曰吾今幸得視吾母之入此土  
此天假其緣也人亦謂孝誠所致孺人二子二女子曰  
瑞業進士舉曰瑛翰舉授義官女長未出適次嫁溧水  
縣學生李懋皆先卒側室生子塘孫男三皆幼孺人於  
閨門中衆德咸備而其所最著者以不妬為本蓋貴昇  
之嗣其先公無他兄弟以胤祚單弱為慮孺人數為之  
置妾妾有過輒箠之不少貸至其生子則愛之如己  
出甚而專寵不較也蓋御之甚寬而戒之甚嚴此不獨

於媵侍為然其平生處家事待臧獲無不然也太史公  
有云女無美惡入宮見妬士無賢不肖入朝見嫌噫如  
孺人者世豈可以多得哉今世名士大夫而懷媚嫉之  
心者比比焉豈不有愧於孺人哉孺人生永樂壬辰八  
月廿七日卒成化癸巳七月初十日享年六十有二以  
乙未十一月廿九日葬懷德南鄉某村新阡銘曰  
詩歌螽斯亦有繆木逮下以德以蕃爾族繁爾夫子夙  
有賢稱孺人是承家室和平夫既貴壽慶延于世胡不  
耄期以啻豐祉季也有文宜顯詩之惟實之書無溢於  
辭

朱孺人衛氏墓誌銘

孺人諱寧姓衛氏常州武進人父能母徐氏年二十歸  
朱氏為吾友悉易之配貞義先生之冢婦時先生授徒  
里中甘貧樂道孺人入門親操汲爨恭勤侍養舅姑喜  
曰吾非得新婦是增一孝女也景泰辛未先生屬疾孺  
人侍湯藥尤謹比卒鬻簪珥具殯殮惟恐不及自是經  
營居室婚娶娣婦皆輟奩中物為之而待賓有饗餼飲  
下有食飲又皆出其經理之素也天順庚辰姑鍾氏感  
風疾扶持起居不去左右甘旨服御必適其意意少不  
懌則引女嬰戲弄其側如是者凡三閱歲而終居喪戚

易雨至接二姊氏歡愛無間久之諸弟求分異孺人屢  
勸止之不可則言於夫凡是先人所遺悉與二弟中分  
之未幾仲弟且破產不能存孺人既携其二子女撫育  
之尤傾橐代償其逋彼猶未愜乃曰汝兄筆畊心織以  
養妻子無餘贏也但我喫飯汝亦喫飯管不使汝飢也  
先是景泰癸酉郡中飢疫姻家蕭氏王氏衛氏皆病疫  
親戚不相往還孺人惻然曰是共棄之也嘗聞尊翁云  
庾袞救病兄得愈袞亦無恙乃知疫癘必不能傳染乃  
具饘粥藥餌勸其夫往視果得救獨蕭氏二人不救又  
勸買棺葬焉凡是殮葬族人之無歸者三人贖族入賣



子歸而自乳者一人養遺棄盲女一人其義聲籍籍隣  
姬里媼類能言之前太守泰和王公嘗延悉易為塾賓  
會朝廷有詔求遺逸公欲舉應詔孺人沮之曰君嘗  
以鹿門公自許初心何可負耶人有以白金數百兩相  
託期均取其息孺人曰此尤不可人或負君君能負彼  
耶凡其平素之所為善相其夫者大率此類孺人生二  
女長文女早夭次桂金餘皆孕而不育聘陳氏為妾撫  
愛之亦不育於是始謀納壻得宜興張氏子世華贅焉  
歲中女金因婉致疾先孺人四月卒孺人哀痛成疾亦  
卒是夏悉易疽發背殆甚陳氏嘆曰吾將誰託耶遂自

經死於是悉易傷往悼亡無以自慰力疾襄事不克自  
振郡太守新淦孫公貳守四明吳公相謂曰是吾郡中  
之賢也顧可使落莫耶遂相之名卿大夫鄉人故舊之  
素相善者又相之予時適歸自南雍悉易狀其行屬予  
銘葬嗚呼孺人以貞明柔靜之資慈愛惠和之德宜享  
壽祺蕃胤嗣斯理也今既失之惟有缺之貞石以壽其  
傳以慰其冥漠而悉易予友吾責也庸可辭乎孺人年  
五十有四其卒以成化十七年正月三日明年壬寅三  
月十六日葬定安西鄉某村先塋以女金祔墓左銘曰  
士刑於家曷承其施厥有賢淑內政是裨孝敬不違生

事死葬友義克敦勿爭而讓具斯二美德莫大焉宜昌  
厥後以永其年胡天難諶竟嗇其報使為善者何以眎  
效嗟予悉易爰相其悲為詔於幽刻此銘詩

孺人王氏墓誌銘

孺人王氏諱貞字喬英予兄修孝處士子也甫笄歸城  
南卞氏為訓之妻閱十有三年年三十二以成化七年  
十一月癸丑卒明年三月丁酉葬其里先塋之次訓謂  
予姻也以書來乞銘且曰訓之妻之毓質名閨成女德  
之賢先生故憐之至其克閑有家盡婦道之順則吾母  
所適而訓攸宜也今其死矣母何賴以孝養訓何所資

以成內理矧訓有子其二在孩一方婉而母遽殞雖水火之虞幸而或免然長育教訓顧安所責成哉此訓所為深悲而先生重為之悼惜者也幸賜之銘以納諸其壙死而有知庶少慰其魂於地下喬英以正統五年七月某甲子生日者云是歲行在申其始生之時與納音相冲當不壽先君庶子府君愛之故為制名字期之以松楸之壽至於提携保護於先太宜人者尤愛甚於其母其母楊氏予丘嫂賢者也厚重溫淳予家食時與予妻處數十年無纖芥隙嫌故喬英之生稟性於其母教成於其家其德克於容其行踐於言蓋不徒刺繡工巧

之足誇而明貞惠和尤有足稱焉先君議不與凡子其  
辭以媒妁之言屢矣訓之考清逸處士與先君故善其  
最後以幣聘至納焉而兩家子皆幼比結縭則清逸既  
下世矣喬英逮事其姑共修婦職姑安其孝以介壽祺  
待姻族讌上禮下御媵婢均一而有恩益卞既大家其  
食指數千公私餽如訓酬應之日不暇給何嘗置意于  
室中而事皆有條舉無遺隊嗚呼若孺人者其可使夫  
關以不善厥終則天賦之以令質而不畀之以脩齡此  
天誠茫茫有非可致詰者哉孺人三子女最長許聘延  
平守錫山盛時望之從子夔男曰某甫三歲其幼即始

婉者未名銘曰

內外之族盛以華孺人勵志忘驕奢禮義俱執尤靜嘉  
行之以躬宜厥家德音雖永壽不遐噫吾將焉咎兮天  
無涯

徐孺人段氏墓誌銘

孺人諱靜姓段氏福建參政伯誠之次女歸徐氏為略  
陽縣令貴昇之冢婦段徐皆毘陵世胄兩家門第相望  
而二公者又宦遊相好也故孺人自少而聘及笄而歸  
其淑慧柔嘉之性既夙著于閨閫而端莊誠敬之德遂  
允宜其家室故為女而族親咸譽成婦而上下交賀謂

姆教有成而宗祀可託非偶然也孺人事母趙宜人盡孝既歸事予姊王氏姑尤孝謹予姊居官寓甚久而家事一不以縈心有孺人在也頃遭疾孺人侍湯藥逾年不懈比卒哭泣之哀至不忍聞先是略陽令鄆城為奸人誣搆事未白而僕竊其貲以竄殆無以自給孺人脫簪珥饋之叔氏塘將娶無以備六禮時其女適受聘遂撒以與之娣劉氏生子多不育而苦於難娩孺人每為之憂調護周悉比生二子則又為之喜姪婦許早寡收養之如在其姑所比死為歛葬且為嫁其二女無異於其母也孺人初不能書及筭數後習之遂通解家素無

織婢教之遂能織此其躬勤儉以輔其夫其夫瑞子甥也  
也才敏為邑庠弟子員用是無內顧憂以勤於學以需  
有顯融此杜羔樂羊子之妻所以有聞於後世也而今  
已矣安知其後之無聞也哉孺人三子淑滂潛三女適  
宋復性周寶一尚幼年四十一以成化己亥十月八日  
卒十一月三日葬懷德南鄉先姑墓左將葬瑞具行實  
來請銘適予病不能執筆然而孺人之賢不可以不銘  
遂強為之銘銘曰  
胡勤其生而不享其成胡厚其德而不永於年齡謂神  
杳杳而天冥冥又安知不卒貽後世名也



思軒文集卷之二十一